

Sier Thomà Mozenigo, procurator.
 Sier Francesco Foscarì.
 Sier Alvixe da Molin.
 Sier Zacaria Dolfim.

Savij a terra ferma.

Sier Piero Lando.
 Sier Zuam Badoer, dotor et cavalier.
 Sier Andrea Trivixam, el cavalier.
 Sier Nicolò Bernardo.
 Sier, manca.

Savij ai ordeni.

Sier Francesco Minio, di sier Bortolo.
 Sier Andrea Navaier, di sier Bernardo.
 Sier Zuam Corner, *quondam* sier Francesco.
 Sier Pollo Morexini, *quondam* sier Francesco.
 Sier Zuam Barbarigo, *quondam* sier Hironimo.

Avogadori di comun.

Sier Zuam Arseni Foscarini.
 Sier Marco Loredam.
 Sier Marco Minio, di sier Bortolo.

137

Dil mexe di luio 1511.

A di primo, fo San Marziliam. Introno in colegio sier Andrea Venier, procurator, e sier Thomà Mozenigo, procurator, et sier Alvise da Molin, di zonta, restò ordinario, savij dil consejo; et intrò, da poi disnar, savio di terra ferma, sier Andrea Trivixam, el cavalier; et sier Alvixe Emo e sier Lucha Trum refudono. Introno *etiam* cai dil consejo di X: sier Hironimo Querini, sier Andrea Loredan e sier Antonio Zustignam, el dotor. Et hessendo eri ritornato di Treviso sier Piero Antonio Morexini, l'auditor nuovo, qual con li cai di X per colegio fo mandato synico a Trevixo, per le querelle date contra sier Alvixe Valaresso, *quondam* sier Gabriel, fo condutier nostro, qual è in exilio, et fu fato sopra le fortification di Trevixo, et referì quanto havia trovato; et quello seguirà, scriverò di soto.

Da poi disnar fo pregadi per far do savij di terra ferma; et, leto le letere, fu fato el scurtinio, ma prima introe consejo di X con la zonta, et stete-no alquanto a lezer letere di corte. Poi fono electi savij di terra ferma, sier Alvixe di Prioli, fo savio a terra ferma, *quondam* sier Piero, procurator, 113,

et sier Zuan Badoer, dotor et cavalier, fo avogador di comun, *quondam* sier Renier, 101; soto, una balota, sier Sabastian Zustignam, el cavalier, et 98 sier Domenego Malipiero, con titolo tuti doi. Tolti 19, *etiam* con titolo, sier Francesco Orio et sier Antonio Condolmer. Et il Badoer introe subito, et il Prioli refudoe.

Fono leto le letere di la corte, di 23 et 24, da Tolentino. Item, di 29, dil provedador Capello, dal porto Cesenatico. Avisa, comme atende a imbarchar le zente, et Babon di Naldo havia fato li fanti, et la Signoria ordeni quello vol si fazi. *Item*, il signor Marco Antonio Colona, è a Imola, feva fanti, et molti comandati, et voleno andar a dar il guasto a Bologna, si non cazerano fuora li Bentivoy; et Ramazoto feva zente. *Item* par, su quel dil ducha di Urbin era stà comandà uno homo per caxa, per questo efeto; *etiam* Zuam Paulo Bagon vi saria. E nota. Le cosse tra fiorentini e senesi non si fa altro; fiorentini stanno cussi per timor dil papa e di Spagna, che voleno ajutar senesi. *Item*, la trieva tra Fiorenza e Siena compì questo san Zuanne passato, et è capetanio di senesi el signor Zuam Vitelli, ha 100 homeni d'arme; e suo fradello, Vitello, è con la Signoria nostra. *Item*, el dito provedador Capello avisa, esser passà un cavalaro, vien di Fiorenza, eridando: Iulio, Iulio, il re di Franza è morto; e cussi accertava era morto. Sollicita, esso provedador, danari per pagar le zente, e arsiliij tornino. Nota, le zente passava a Chioza poi a a Monte Alban e in campo.

Fu posto, per li savij, di revochar certa parte fu presa, che 'l podestà et capetanio di Cao d'Istria sia synicho dil podestà di San Lorenzo, la qual si dovea meter in gran consejo, et per tanto la dita parte sia suspesa, et che dito synicha' aspeti a li auditori nuovi. E fu presa.

Fu posto, per sier Bernardo Bembo, dotor et cavalier, consier, una letera a li rectori di Padoa e sier Christofal Moro, provedador zeneral in Padoa, in risposta di sue, zercha il butar zoso la caxa di Piero di Gabrieli, citadini padoam, è di là dil Bassanello, che debbo mesurar 500 pertege da le mure etc.; et, trovando la dita caxa esser alquanto nel numero, debbi rescriver e soprastar a butarla zoso, atento che 'l patron si habbi oferto a la Signoria impiria de brusche, e, in ogni bisogno, *immediate* sia brusata, *ut in ea*. Et parloe contra sier Zacaria Dolfim, savio dil consejo, qual è stato capetanio a Padoa, a tempo di l'assedio, dicendo, se dia butar zoso e non favorir rebelli etc., cargando alquanto el

137*